

## ATODLEN 1

(a gyflwynwyd gan adran 85)

### CYFRANIADAU TUAG AT GYNHALIAETH PLANT SY’N DERBYN GOFAL

#### *Atebolrwydd am gyfrannu*

- 1 (1) Pan fo awdurdod lleol yn gofalu am blentyn (mewn achosion ar wahân i’r rhai a grybwyllir yn is-baragraff (8)) rhaid iddo ystyried a ddylai adennill cyfraniadau tuag at gynhaliaeth y plentyn gan unrhyw berson sy’n atebol am gyfrannu (“cyfrannwr”).
- (2) Dim ond pan fo awdurdod lleol yn ystyried ei bod yn rhesymol y caniateir iddo adennill cyfraniadau gan gyfrannwr.
- (3) Mae person yn atebol am gyfrannu os yw’n oedolyn sydd â chyfrifoldeb rhiant dros y plentyn.
- (4) Nid yw person yn atebol am gyfrannu yn ystod unrhyw gyfnod pan fo’n cael budd-dal sy’n dod o fewn categori a bennir mewn rheoliadau.
- (5) Yn is-baragraff (4) mae “budd-dal” yn cynnwys unrhyw lwfans, taliad, credyd neu fenthyciad.
- (6) Nid yw person yn atebol am gyfrannu tuag at gynhaliaeth plentyn y mae awdurdod lleol yn gofalu amdano mewn cysylltiad ag unrhyw gyfnod y mae’r plentyn yn byw gydag un o rieni’r plentyn o dan drefniadau a wneir gan yr awdurdod yn unol ag adran 81.
- (7) Nid oes rhaid i gyfrannwr wneud unrhyw gyfraniad tuag at gynhaliaeth plentyn ac eithrio fel a gytunir neu a ddyfernir yn unol â’r Atodlen hon.
- (8) Yr achosion yw’r rhai lle y mae awdurdod lleol yn gofalu am blentyn o dan—
  - (a) adran 76;
  - (b) gorchymyn gofal interim o dan Ddeddf Plant 1989;
  - (c) adran 92 o Ddeddf Pwerau Llysoedd Troseddol (Dedfrydu) 2000.

#### *Cyfraniadau y cytunwyd arnynt*

- 2 (1) Ni chaniateir i gyfraniadau tuag at gynhaliaeth plentyn gael eu hadennill ond os yw’r awdurdod lleol wedi cyflwyno hysbysiad (“hysbysiad cyfrannu”) i’r cyfrannwr yn pennu—
  - (a) y swm wythnosol y mae’n barnu y dylid ei gyfrannu, a
  - (b) trefniadau ar gyfer talu.
- (2) Rhaid i’r hysbysiad cyfrannu fod yn ysgrifenedig ac wedi ei ddyddio.
- (3) Rhaid i’r trefniadau ar gyfer talu gynnwys, yn benodol—
  - (a) y dyddiad y mae atebolrwydd am gyfrannu’n dechrau (y mae’n rhaid i’r dyddiad beidio â bod yn gynharach na dyddiad yr hysbysiad),
  - (b) y dyddiad y bydd atebolrwydd o dan yr hysbysiad yn dod i ben (os nad yw’r plentyn, cyn y dyddiad hwnnw, wedi peidio â bod yn un sy’n derbyn gofal gan yr awdurdod), ac
  - (c) y dyddiad pryd y mae’r taliad cyntaf i’w wneud.
- (4) Caiff yr awdurdod bennu, mewn hysbysiad cyfrannu, swm wythnosol sy’n gyfraniad safonol a ddyfernir gan yr awdurdod ar gyfer yr holl blant y mae’n gofalu amdanynt.

- (5) Ni chaiff awdurdod bennu, mewn hysbysiad cyfrannu, swm wythnosol sy’n uwch na’r hyn y mae’n barnu—
- (a) y byddai fel arfer yn barod i’w dalu pe bai wedi lleoli plentyn tebyg gyda rhieni maeth awdurdod lleol, a
  - (b) ei bod yn rhesymol ymarferol i’r cyfrannwr dalu (gan roi sylw i’w foddion byw).
- (6) Caiff awdurdod dynnu hysbysiad cyfrannu yn ôl ar unrhyw bryd (heb effeithio ar ei bŵer i gyflwyno un arall).
- (7) Pan fo’r awdurdod a’r cyfrannwr yn cytuno ar—
- (a) y swm y mae’r cyfrannwr i’w gyfrannu, a
  - (b) trefniadau ar gyfer talu,
- (p’un ai fel a bennir yn yr hysbysiad cyfrannu neu fel arall) a bod y cyfrannwr yn hysbysu’r awdurdod yn ysgrifenedig ei fod yn cytuno â hynny, caiff yr awdurdod adennill yn ddiannod, fel dyled sifil, unrhyw gyfraniad sy’n orddyledus a heb ei dalu.
- (8) Nid yw is-baragraff (7) yn effeithio ar unrhyw ddull arall o adennill costau.
- (9) Caiff cyfrannwr, drwy gyflwyno hysbysiad ysgrifenedig i’r awdurdod, dynnu ei gytundeb yn ôl mewn perthynas ag unrhyw gyfnod atebolrwydd sy’n dod ar ôl y dyddiad y cyflwynwyd yr hysbysiad.

### *Gorchmynion cyfraniadau*

- 3 (1) Pan fo hysbysiad cyfrannu wedi ei gyflwyno i gyfrannwr a bod—
- (a) y cyfrannwr wedi methu â dod i unrhyw gytundeb gyda’r awdurdod lleol fel a grybwyllwyd ym mharagraff 2(7) o fewn cyfnod o fis sy’n dechrau ar y diwrnod y cyflwynwyd yr hysbysiad am gyfraniadau, neu
  - (b) y cyfrannwr wedi cyflwyno hysbysiad o dan baragraff 2(9) yn tynnu ei gytundeb yn ôl,
- caiff yr awdurdod wneud cais i’r llys am orchymyn o dan y paragraff hwn.
- (2) Wrth gael cais o’r fath caiff y llys wneud gorchymyn (“gorchymyn cyfrannu”) yn ei gwneud yn ofynnol i’r cyfrannwr gyfrannu swm wythnosol tuag at gynhaliaeth y plentyn yn unol â threfniadau ar gyfer talu a bennir gan y llys.
- (3) O ran gorchymyn cyfrannu—
- (a) ni chaiff bennu swm wythnosol sy’n uwch na’r hyn a bennir yn yr hysbysiad cyfrannu, a
  - (b) rhaid ei wneud gan roi sylw i foddion byw y cyfrannwr.
- (4) Ni chaiff gorchymyn cyfrannu—
- (a) dod yn effeithiol cyn y dyddiad a bennir yn yr hysbysiad cyfrannu,
  - (b) cael effaith tra na bo’r cyfrannwr yn atebol am gyfrannu (yn rhinwedd paragraff 1), nac
  - (c) aros mewn grym ar ôl i’r plentyn beidio mwyach â bod yn un sy’n derbyn gofal gan yr awdurdod a sicrhaodd y gorchymyn.
- (5) Ni chaiff awdurdod wneud cais i’r llys o dan is-baragraff (1) mewn perthynas â hysbysiad cyfrannu y mae wedi ei dynnu yn ôl.
- (6) Pan fo—

- (a) gorchymyn cyfrannu mewn grym,
  - (b) yr awdurdod yn cyflwyno hysbysiad cyfrannu arall, ac
  - (c) y cyfrannwr a’r awdurdod yn dod i gytundeb o dan baragraff 2(7) mewn perthynas â’r hysbysiad cyfrannu arall hwnnw,
- effaith y cytundeb yw disodli’r gorchymyn o’r dyddiad y cytunir bod y cytundeb i ddod yn effeithiol.
- (7) Pan ddeuir i gytundeb yn yr amgylchiadau a ddisgrifiwyd yn is-baragraff (6) rhaid i’r awdurdod hysbysu’r llys—
- (a) am y cytundeb, a
  - (b) am y dyddiad y daeth yn effeithiol.
- (8) Caniateir i orchymyn cyfrannu gael ei amrywio neu ei ddirymu ar gais y cyfrannwr neu’r awdurdod.
- (9) Mewn achos cyfreithiol ar gyfer amrywio gorchymyn cyfrannu, rhaid i’r awdurdod bennu—
- (a) y swm wythnosol, gan roi sylw i baragraff 2, y mae’n bwriadu y dylai’r cyfrannwr ei gyfrannu o dan y gorchymyn fel y bydd yn cael ei amrywio, a
  - (b) y trefniadau arfaethedig ar gyfer talu.
- (10) Pan fo gorchymyn cyfrannu wedi ei amrywio—
- (a) ni chaiff y gorchymyn bennu swm wythnosol sy’n uwch na’r un a bennwyd gan yr awdurdod yn yr achos cyfreithiol ar gyfer ei amrywio, a
  - (b) rhaid i’r gorchymyn gael ei wneud gan roi sylw i foddion byw y cyfrannwr.
- (11) Ceir gwneud apêl yn unol â rheolau’r llys yn erbyn unrhyw orchymyn a wneir o dan y paragraff hwn.

*Gorfodi gorchymynion cyfraniadau etc*

- 4 (1) Mae gorchymyn cyfrannu a wneir gan lys ynadon yn orfodadwy fel gorchymyn cynhaliaeth llys ynadon (o fewn ystyr “magistrates’ court maintenance order” yn adran 150(1) o Ddeddf Llysoedd Ynadon 1980).
- (2) Mae is-baragraff (1) yn peidio â chael effaith ar y diwrnod y daw paragraff 120 o Atodlen 11 i Ddeddf Troseddu a’r Llysoedd 2013 i rym.
- (3) Pan fo cyfrannwr wedi cytuno, neu wedi cael ei orchymyn, i wneud cyfraniadau i awdurdod lleol, caiff unrhyw awdurdod lleol arall y mae’r cyfrannwr yn byw yn ei ardal am y tro—
- (a) ar gais yr awdurdod lleol a gyflwynodd yr hysbysiad cyfrannu, a
  - (b) yn ddarostyngedig i gytundeb ynghylch unrhyw swm sydd i’w ddidynnu mewn cysylltiad â’r gwasanaethau a ddarparwyd,
- gasglu oddi wrth y cyfrannwr unrhyw gyfraniadau sy’n ddyledus ar ran yr awdurdod a gyflwynodd yr hysbysiad.
- (4) Mae’r pŵer i gasglu symiau o dan is-baragraff (3) yn cynnwys pŵer i—
- (a) cael unrhyw gyfraniadau sy’n ddyledus a rhoi rhyddhad rhag eu talu, a
  - (b) (os yw’n angenrheidiol) gorfodi unrhyw gyfraniadau i gael eu talu,
- er ei bod yn bosibl bod y cyfraniadau hynny wedi dod yn ddyledus ar adeg pan roedd y cyfrannwr yn byw yn rhywle arall.

- (5) Mae unrhyw gyfraniad a gesglir o dan is-baragraff (3) i’w dalu (yn ddarostyngedig i unrhyw ddiidyniad y cytunwyd arno) i’r awdurdod lleol a gyflwynodd yr hysbysiad cyfraniadau.
- (6) Mewn unrhyw achos cyfreithiol o dan y paragraff hwn, mae dogfen—
- (a) sy’n honni ei bod yn gopi o orchymyn a wnaed gan lys o dan neu yn rhinwedd paragraff 3, a
  - (b) sy’n honni ei bod wedi ei hardystio’n wir gopi gan y swyddog dynodedig i’r llys,
- i’w derbyn fel tystiolaeth o’r gorchymyn.
- (7) Mewn unrhyw achos cyfreithiol o dan y paragraff hwn, mae tystysgrif—
- (a) sy’n honni ei bod wedi ei llofnodi gan y cleric neu gan ryw swyddog arall a awdurdodwyd yn briodol a hwnnw’n swyddog i’r awdurdod lleol a sicrhodd y gorchymyn cyfrannu, a
  - (c) sy’n nodi bod unrhyw swm sy’n ddyledus i’r awdurdod o dan y gorchymyn yn orddyledus a heb ei dalu,
- i’w derbyn fel tystiolaeth bod y swm yn orddyledus a heb ei dalu.

#### *Rheoliadau*

- 5 Caiff rheoliadau ddarparu ar gyfer—
- (a) yr ystyriaethau y mae’n rhaid i awdurdod lleol eu hystyried wrth benderfynu—
    - (i) a yw’n rhesymol adennill cyfraniadau, a
    - (ii) yr hyn y dylai’r trefniadau ar gyfer talu fod;
  - (b) y gweithdrefnau y mae’n rhaid i awdurdod lleol eu dilyn wrth ddod i gytundeb â’r canlynol—
    - (i) cyfranwyr (o dan baragraffau 2 a 3), a
    - (ii) unrhyw awdurdod lleol arall (o dan baragraff 4).

#### *Cyflwyno hysbysiad cyfrannu*

- 6 (1) Caniateir i hysbysiad cyfrannu y mae’n ofynnol ei gyflwyno i gyfrannwr o dan yr Atodlen hon gael ei gyflwyno i’r cyfrannwr—
- (a) drwy ei ddsbarthu’n bersonol i’r cyfrannwr, neu
  - (b) drwy ei anfon at y cyfrannwr—
    - (i) drwy wasanaeth post cofrestredig (fel y diffinnir “registered post service” gan adran 125(1) o Ddeddf Gwasanaethau Post 2000), neu
    - (ii) drwy wasanaeth post sy’n darparu i ddsbarthiad y ddogfen gael ei gofnodi.
- (2) At ddibenion adran 7 o Ddeddf Ddehongli 1978 o ran ei chymhwysu i’r paragraff hwn, cyfeiriad priodol cyfrannwr yw cyfeiriad hysbys diwethaf y cyfrannwr.